

будучими от велможного пна его млсти князя Мартина Кгедройтя, старосты Вилькомирского, державцы Обельского, Малхеромъ Кгинеитомъ подстаростим, Юремъ Кгедройтем судею, а Андреем Крончою писаром, постановившысе очевисто ей млсть пни Алжбета Балтроевна Довмонта Сесицьского, хоружанка Вилкомирская, Петровая Кградовская и малжонок ее панъ Петръ Янович Кградовский, землянка и земенинъ грский повету Ковеньского, оповедали и покладали лист свой доброволны запис выреченья посагу малжонце пана Петра Кградовского належачого, за досыт учыненемъ ей, водлугъ которого листу своего на все, што в немъ описано ест, зезволившы, ствержаючи его порядком права посполитого, сами ку записанью до книгъ кгородских Вилкомирскихъ признали, просечы, абы до книг кгородскихъ Вилкомирскихъ был вписан, которого мы вряд огледавши и читаного достатечне выслухавшы, велели есмо его до книг вписати, которы так се в себе маеть: Я Алжбета Балтроевна Довмонта Сесицьковна, хоружанка Вилкомирская, Петровая Кградовская и я Петръ Кградовский, малжонок помененое пни Алжбеты, землянка и земенин повету Ковеньского, чиним явно и визнаваем сим нашим доброволнымъ листомъ, ижъ славное памяти его млсть пан Балтроем Довмонт Сесицьский, хоружы Вилкомирский, пан отец мой, еще за живота своего такъ и малжонка его млсти ей млсть пни Ганна Деялтовского Балтроевна Сесицкая, пни матка моя Алжбеты, выдаючи мене Алжбету в стан светый малженский за мене Петра Кградовского, посагу выправу зо всех именей своих отчызных и матерыхтх мне належачы отдали и заплатили и за все мне их млсть досыт учинили и вжо от сего часу и даты, в сем листе нашем описаное, никоторого посагу и выправы со всяких имен отчызных и матерыхтх у ее млсти пни матки моее и у их млсти пнов брати моее

Алжбеты, детей и потомъков их млсти, упоминатисе и позыскивати не маю, мы сами особы помененые, дети, потомъкове наши вечными часы под заплаченемъ вины их млстям петисот коп грошей литовских. И на то есмо дали сес наш лист, под печатми нашими властными и с подписомъ руки моей Петра Кградовского полскимъ писмомъ и под печатми людей зацъных их млсти пна Андрея Давидовича, земенина гдрского повету Вилкомирского, пна Станислава Довмонта Сесицкого а пна Петра Станиславовича Песлевича, енерала возного повету Вилкомирского. Писан в Сесиках, року тисеча пятсот деветьдесять шостого, мца марца первого дня. У того листу печатей прытисненых пять а подписы рукъ писмом полским и рускимъ тыми словы: Piotr Gradowski własną ręką podpisał. Andrzej Dawidowicz ręką swą własną. Петръ Станиславович Песлевича, енералны возны Вилкомирский, властною рукою подписал. Которое добровольное сознане особ веръху помененых и тот листъ их до книг кгородских Вилкомирскихъ ест вписан.

№ 93. Дарственная запись Христины Сесицкой въ пользу мужа ея Яна Сесицнаго.

Году отъ нароженья Сына Божего тисеча пятсот деветьдесять шостого, мца марца осмого дня.

На рочках кгородских сего мца марца прыпалых и судовне в дворе господарскомъ Вилкомирскомъ отправованых, перед нами вранниками судовыми кгородскими Вилкомирскими, будучими от велможного пна его млсти князя Мартина Кгедройтя, старосты Вилкомирского, державцы Обельского, Малхеромъ Кгинеитомъ подстаростим, Юремъ Кгедройтем судею а Андреем Крончою писаромъ, постановившысе очевисто ей млсть пни

Крыстына Яновна Шеметовна, старостянка Побоцкая, оповедала и покладала лист свой вызнаны запис даровизну трох тисечей коп гршей литовских малжонку ей млсти его млсти пну Яну Сесицъскому, хоружому повету Вилкомирского, данный, а меновите ниже помененый, водлугъ которого листу своего на все, што в нем описано ест, зезволившы, ствержаючи его порадкомъ права посполитого, сама ей млсть ку записаню до книг кгородских Вилкомирских признала, просечы, абы пры том сознаныю ей млсти и тот лист до книг кгородских Вилкомирскихъ был вписанъ, которого мы врад огледавши и чытаного достаточне выслушавшы, велели есмо его до книг вписати, которы до книг вписуючы от слова до слова так се в себе маеть: Я, Крыстына Яновна Шеметовна, старостянка Ботоцкая, Яновая Довмонъта Сесицкая, хоружина Вилкомирская, чыню явно и визнаваю сим моим вызнаным листом и добровольным записомъ, иж што его млсть пан Ян Балтроевич Довмонт Сесицъский, хоружи Вилкомирски, малжонкъ мой милый, записал мне от иных листомъ и взнес заставным обычаемъ суму пнзей две тисечы копъ гршей литовских, на имени своем Кгелванъскомъ Довмонтовъском отчизномъ, лежакомъ в повете Виленском, на всей огулом части того имения Кгелванского, которая от брата его млсти рожного на него припасти маеть, а другим листом записал мне тисечу копъ гршей литовскихъ на всяких речах своих рухomyх и на долгах позычоных, о чомъ шырей и достаточней на тых листехъ мне от его млсти на то даных описано и доложено ест, ино я Крыстына Яновна Шеметовна Яновая Сесицкая, узнавши по его млсти пну Яну Сесицким, хоружым Вилкомирским, малжонку моем милымъ, прыстойную и зычливую милост, с хути и милости моее, по животе моем даю ему, дарую тую суму пнзей вышей помененую всю яко две тисечы коп гршей

литовскихъ на части имения Кгелванского, в повете Виленскомъ лежакого, мне записаную и взнесеную, так и третью тисечу коп гршей на всяких долгах и речах рухomyх мне ж записаную, до того вси мои речы рухомые, якож колвек названные, вси от мала до веля, грошы готовые, золото, серебро, перла, клейноты, шаты и иные, што бы одно колвекъ по животе моемъ zostало, тому помененому малжонку моему милему его млсти пну Яну Сесицъскому вечными часы записую, отдаляючи от тое помененое все сумы, так теж и от речы моих, всяких блиских кровных и повиноватых моих, которую тою сумою и речми рухомыми от мене его млсти дарованою и записаною скоро по животе моем волно будет ему малжонку моему милему водлуг воли и уподобания своего шафовати, отдати, даровати и кому хочечы вечностю записати. И на то я, Крыстына Шеметовна Яновая Сесиская, дала есми сес мой лист добровольны запис его млсти пну Яну Сесицкому, хоружому Вилкомирскому, под моею властною печатю и сподъписом властное руки моее полскимъ писмом, а пры том были и того добре сведомы люди зацные их млсть пан Андрей Янович Давидовича, земенин гдрский повету Вилкомирского, а пан Петр Янович Кградовский, земенин гдрский повету Ковеньского, а пан Петр Станиславович Песлевич, енерал возный повету Вилкомирского, которых просила есми къ сему о прыложене печатей и о подписане рук, што их млсть на устную и очевистую прозбу мою то учинили, печати приложили и руками своими къ сему моему листу подписати рачили. Писан в Сесиках, року тисеча пятсот деведсят шостого, мца марца пятого дня. У того листу печатей прытисненых чотыры, а подписы рук полским и рускимъ писмом тыми словы: Ianowa Siesicka Krystyna Szemetowna ręką swą. Andrzej Dawidowicz ręką swą własną. Piotr Gradowski własną ręką podpisał.

Петръ Станиславович Песлевича, енерални возны Вилкомирскій, властною рукою подписал. Которое добровольное сознание верху помененых особъ и тот лист их до книг кгородскихъ Вилкомирскихъ ест вписан.

№ 94. Запись Яна Сесицскаго въ пользу жены его тысячи коп. гр. литовскихъ.

Году от нароженя Сына Божего тисеча пятацот деветдесят шостого, мѣца марца осмого дня.

На рочькох кгородскихъ сего мѣца марца прыпалых и судовне в дворе гдрскомъ Вилкомирскомъ отправоуваных, передъ нами, врадниками судовыми кгородскими Вилкомирьскими, будучыми отъ велможного пна его млсти князя Мартина Кгедройтя, старосты Вилкомирского, державцы Обелского, Малхером Кгинейтом подстаростим, Юремъ Кгедройтем судею а Андреем Крончою писаром, постановившысе очевисто его млсть пан Ян Балтроевич Довмонт Сесицскій, хоружы повету Вилкомирского, оповедал и покладал лист свой добровольны запис от его млсти малжонце его млсти пней Крыстыне Шеметовне на тисечу коп грошей, позычоную у ей млсти, ей млсти даный, внесеня тое сумы позычоное на вси долги его млсти, водлуг которого листу своего на все, што в нем описано ест, зезволившы, ствержаючы его порадком права посполитого, сам его млсть ку вписаню до книгъ кгородскихъ Вилкомирскихъ признал, просечы, абы пры том сознанию его млсти и тот лист до книгъ был вписанъ, которго мы вряд огледавшы и чытаного достаточъне выслужавшы, велели есмо его до книгъ вписати, которы до книгъ вписуючы от слова до слова так се в себе маеть: Я Ян Балтроевич Довмонт Сесицскій, хоружы повету Вилкомирского, чиню явно и визнаваю сим моим добровольным листом,

иж будучы я пилно потребен пнзей, взял и позычил есми готовых рукоданъных певную суму пнзей, то ест тисечу коп грошей литовскихъ, личечы у кожды грош по десети пнзей белых, а в копу по шестидесять грошей литовскихъ у малжоньки моей милой паней Крыстыны Шеметовны, которую тую суму пнзей тисечу коп грошей, от мене позычоную, взялаша и сим листом записую ей малжонце моей пней Крыстыне Шеметовне на всякихъ долгахъ моих, которые бы се одно колвекъ тепер и на потом у мене позычонные показали, а она, малжонка моя, пни Крыстына Шеметовна, волна будетъ тую суму свою, всю тисечу коп грошей литовскихъ мне позычоную, такъ за живота яко и по животе своем кому хочечы отдати и заплайти, яко своею властностью шафовати, а я сам Ян Сесицскій, потомъкове албо блиские мои, повинни будем ей малжонце моей тую суму пнзей тисечу коп грошей ей самой, албо тому, кому то от нее дано албо записано было, а буд грошми готовыми заплатити албо на всякой маетности моей рухомой и на долгахъ, зоставахъ, где бы се одно якие указали, тую тисечу копъ грошей оправити, даючы волност той малъжоньце моей пней Крыстыне Шеметовне и тому, кому бы то од нее дано албо записано было, так за живота яко и по животе моем, што бы одно колвек речей моих рухомухъ было, албо где бы се долъги у мене позычонные и заставы якие указали, волно арештовати и то все в моцы своей деръжати до оддана ей сполна все тое сумы тисечы копъ грошей литовскихъ, чому я и потомъкове мои противни быти не маемо. И на то я Янъ Сесицскій, хоружы Вилкомирскій, дал есми малжоньце пней Крыстыне Шеметовне сес мой добровольны запис, под моею печатю и с подписом властное руки моей писмом полским и под печатми и с подписы рук пнов зацныхъ, от мене устне упрошонных, их млстей пна Андрея Яновича

Давидовича, земенина гдрьского повету Вилкомирского, пна Петра Яновича Кградовского, земенина гдрьского повету Ковенского а пна Петра Станиславовича Песлевича, енерала возного повету Вилкомирского. Писан в Сесиках, року от нароженья Сына Божего тисеча пятсот деветдесят шостого, мца Марца первого дня. У того листу печатей притисненных чотыры и подписы рук писмом полским и рускимъ тыми словы: Ian Sie-sicki chorąży Wilkomirski ręką swą. Andrzej Dawidowicz ręką swą własną. Piotr Gradowski własną ręką podpisał. Петръ Станиславович Песлевичъ, енералны возны Вилкомирский, властною рукою подписалъ. Которое жъ тое добровольное, явное, устное а очевистое сознание при листе вделаное, есть до книгъ кгородских Вилкомирскихъ записано.

№ 95. Заявленіе вознаго о ввѣдѣ Коплевскихъ во владѣніе одною службою людей.

Году от нароженья Сына Божего тисеча пятсот деветъдесят шостого, мца Марца осмого дня.

На рочькох кгородских сего мца Марца припалых и судовне у дворе гдрьскомъ Вилкомирскомъ отправованых, перед нами, врадниками кгородскими Вилкомирскими, будущими от вельможнаго пна его млети князя Мартина Кгедройтя, Старосты Вилкомирского, державцы Обелского, Малхеромъ Кгинеитомъ подстаростим, Юремъ Кгедройтем судею а Андреемъ Крончою писаром, постановивъшысе очевисто возный гдрьскій повету Вилкомирского Станиславъ Янович сознание свое устное ку записаныс до книгъ кродских Вилкомирскихъ, пры квите своем, очевисто вделал, которы квит так написан: я Станислав Янович, возный гдрьскій повету Вилкомирского, сознаваю тымъ моим квитомъ, ижъ

в году теперешнемъ тисеча пятсот деветдесят шостом, мца Марца семого дня, передо мною возным и стороною двема шляхтичами паномъ Станиславом Юревичем а паномъ Шымоном Матеевичом, земенин гдрьскій повету Вилкомирского пан Михал Станиславович Коплевскій и малжонка его пни Катерина Захарияшовна земенину гдрьскому, подстолему повету Вилкомирскому, пну Андрею Яновичу Коплевскому и малжонъце его паней Радковщанце, водлугъ листу своего заставного у пети десяти копах грошей литовьских и у пети копахъ грошей службу людей на име Стася Богдановича, Яна Лаврина Миколаевичов з детми, з жонами, з домами, маестностями, з кгрунты их всякими до тое службы людей прыналежачыми, в моц, в держанье и ужыване подали пну подстолему и малжонце его до отдаия тое суммы пнзей, о чом всем шырей подостатку в листе заставномъ описано и доложено ест. Которы тотъ квит сознанья своего дадем под печатью своею и с подписом руки моее и под печатъми тыхъ двух шляхтичов, звышъ имени помененых, при мне стороною бывых. У того квиту печатей притисненных тры, а подпис руки его возного тыми словы: Станиславъ Янович возны, рукою своею подписал. Которое ж тое оповедане и сознание возного ест до книгъ кгородских Вилкомирскихъ записано.

№ 96. Заявленіе возныхъ о ввѣдѣ ими Яна Кончи во владѣніе имѣніемъ Горнишками.

Году от нароженья Сына Божего тисеча пять сотъ деветъдесят шостого, мца Марца осмого дня.

На рочкох кгородских сего мца Марца прыпалых и судовне в дворе гдрьском Вилкомирском отправованыхъ

перед нами, владниками кгородскими Вилькомирскими, будущими от велможнаго пна его млсти князя Мартина Кгедройтя, старосты Вилкомирского, державцы Обелского, Малхером Кгинеитом подстаростим, Юремъ Кгедройтемъ судьою а Андреем Крончою писаром, постановившысе очевисто дворенин его королевское млсти пан Ян Войтехович Кгинтовтъ, а возные два повету Вилкомирского Лаврын Григоревич, а Станислав Бартошевич, сознане свое устное пры листе увязчомъ поданя через нихъ села прозываемого Кгорнишокъ, в повете Вилкомирском лежакого, водле декрету его кр. млсти пну Яну Яновичу Кончы поданого, ку записаню до книгъ кгородскихъ Вилькомирскихъ вделали, которы уписуючы от слова до слова такъ се в себе маеть: я Ян Войтехович Кгинтовтъ, дворенин его королевское милости, ознаймую тым моим квитом, иж што в року теперешнемъ тисеча пят сот деветъдесятъ шостомъ, его королевская млсть, отсудившы у Кракове села Кгорнишок. в повете Вилкомирском лежакого, пна Яна Станиславовича Бирбашевского пну Яну Яновичу Кончы, земенину гдрьскому повету Вилкомирского прысудит рачыл, о чом его королевская милость до мене лист свой отворыстый писати рачил, абых я ехавшы до того села Кгорнишокъ, водлугъ декрету его королевское млсти пна пана Яна Кончу у тое село Кгорнишки увезал, в моц и в держане его подал, про то я Ян Войтехович Кгинтовт в року теперешнем деветъдесят шостом, мца февраля двадцат осмого дня, маючы пры себе возных двух повету Вилкомирского пна Лаврына Григоревича и пна Станислава Бартошевича и стороною шляхтичов пят, землян повету Вилкомирского, пна Войтеха Амъброжеевича Киру, Алексея Мончевича, Якуба Дулька Лукаша и Юря Балтроевичов Пексцов, ездилон там до того села Кгорнишок с тыми

возными и стороною пры пане Яне Яновичу Кончы и, кгдах мо уехали у село, нашолон, стоечы на улицы, пна Яна Станиславовича Бирбашевского с прыятелми его и кгда указавшы декрет в тое село учынены и листъ короля его милости отворыстый, до себе писаны, для поданя того села Кгорнишок, спыталомъ, естли бы не спротивляючыся декретови его королевское млсти тое село хотел пну Яну Яновичу Кончы поступити, на што пан Ян Бирбашевский поведил: ижъ я тое село Кгорнишки, не будучы противенъ выроку короля его млсти, пну Яну Кончы поступую; што я тыми возными и стороною осветчывшы пна Яна Яновича Кончу у тое село Кгорнишки з кгрунты, пашнями, селы, гаи, з людми оселыми, моркгами и зо всеми прынадлежностями до того села здавна и тепер належачими и зо всим тым, яко небощык Станислав Бирбашевский держал, увезал, в моц и в держане подал, приказавшы всим подданым того села послушенства и звыкълую повинност, абы яко пну своему од сего часу отдавали, на што сес лист мой с подписом руки моее и под моею печатю также под печатми и подписы возных верху менованыхъ и под печатми стороны верху менованое пну Яну Яновичу Кончы даю. Писан в Кгорнишках, року тисеча пятсот деветъдесят шостого, мца февраля двадцат осмого дня. У того листу печатей прытисненых осмъ а подпис рукъ полским и руским писмом тыми словы подписаны: Jan Gintowt dworani krolia iegomsczy ręką swą. Лаврын Григоревич возны, рукою власною подписалъ. Woiciech Kirna przy thy sprawie bywszy rękę podpisał, pieczęć przyłożył. Станислав Бартошевич возный руку свою подписал. Якуб Дулка власною подписал. Которое тое устьяное очевистое сознане особъ звыш помененых, пры квите уделаное, и тот квит их до книг кгородских Вилкомирских естъ записано.